

[0494] BY PREF. DR. W.J. BUMA SYN OFGEAN AS SAMLER

Mei yngong fan dit jier is pref. Buma âld-heechlearer wurden, mjikres as men sa wol. En om't it samlerskip fan *Us Wurk* keppele is oan it tsjinstforbân, is der ek oan dy funksje in ein kommen. De dûr fan dat samlerskip - goed 20 jier - en de reden fan ophâlden - it mei pensjoen gean - binne beide oant nou ta net foarkommen yn de skiednis fan dit yn 1952 fan pref. dr. J.H. Brouwer groundearre tydskrift.

Fan mear bilang as dat tiidsrekord is fansels de frage hoe't Buma syn meibistjûrderskip opfette hat. Hwa't in tydskrift mei liede wol, moat krekt en keken wêze. Om it ynstitútsbled hwat moaijer útsjoch to jaen die Buma writen om it printe to krijen op in earsteklas adres en printe is it sont 1959 oant de brune it net mear lûke koe en fannijs op offset oerskeakele wurde moast. Wy wienen doe yn safier foarútbuorke dat alles op ús eigen mesines "set" wurde koe en ek de meast útwrydske tekens gjin swierrichheden mear joegen, hwat by printsjen soms in krús is; dat yn in wêzen hoegden wy amper in takke tobek. En hwat Buma syn krektens oanbilanget, wel, in stik koe fan de redaksje goedkard wêze om 'e ynhâld, mar dat woe dêrom net sizze dat it ek ûnforoare publisearre waard: de skriuwer koe, as it moast oant op syn fekânsje-adres, rekkenje op in tillefoantsje út it ynstitút wei, as der hwat mei syn tael net alhiel yn 'e es wie, hwant sûnder oerliz koe soks fansels net foroare wurde. Hoe heech at Buma syn wurk as einredakteur opfette hie, waerden dyjingen gewaer dy't yn it lêst fan de 60-er jierren dat wurk oernamen; hja hawwe foargoed learjild bitelje moatten.

It forskaet fan meiwurkers oan *Us Wurk* en dêrmei it forskaet yn de bydragen is greater wurden yn dy tweintich jier. It wurk fan in redaksje wurdt sadwaende fansels ek navenant swierder, hwant al is it mêd fan de frisistyk dan mooglik noch wol oer to sjen, elk hat sa syn spesialismen en dat kin men ek skoan merkbite oan de *eigen* bydragen fan in redakteur. Sa geane dy fan Buma foaral oer it komôf fan it Fryske wurd, gjin niget as wy wite dat syn selsstannige útjeften yn haedsaek geane oer it âldste Frysk dat wy hawwe.¹ Al dy tydskriftbydragen skreau er yn in Frysk dat der om syn gevens útrint en dat foar in frjemd wurd gauris in eigen of in eigenoanrette wjergader sjen lit, dit om de lêzers-bûten-it-fak to skewielen. Buma hat syn skriuwnoarm woun út it klassike Nijfrysk en op syn wize in stik taelsoarch en taelbou bidreaun yn in formidden dat dy beide dingen oant nou ta sa goed as lizze lit: krekt oarsom, wy kinne hjoeddedei lûden hearre dy't der op út wolle, wy soene fan dat de sé mar oer it lân komme litte moatte.

Pensjoen bitsjut foar greate skiften fan ús maetskippij it fan de iene dei yn de oare midden út it folle wurk wei twongen wurde ta neatdwaen, mei de ús njonkelytsen wol-

bikende gefolgen. Yn dat stik is in wittenshipsman tige bifoarrjochte: syn niget bliuwt en syn wurk kin trochgean. Hwat earder *moast, mei* nou. Dat foarrjocht is ek Buma biskern. Sa binne wol syn kolleezjes ophouden, mar de lessen Goatysk en Frysk MU-B kinne trochgean. Wol sit yn syn keamer op it ynstitút nou syn opfolger, mar fuort en daelk is foar him in oare romte frijmakke en sa hawwe wy him geregeldwei yn ús formidden, drok beuzich mei de Aldfryske tekst-útjeften, krekt as foartiid.

Sa hoopje wy ek dat *Us Wurk* tonei sÿn wurk mei bliuwe sil. Wis, fan dat skipke, dat alle wrâldséen oerstrûst, hat nou in oar it helmhout yn hannen, mar dy en syn folk rekkenje der stilswijend op dat de âld-skipper in each mei yn 't seil hâldt.

Mei út namme fan de oare redaksjeleden:

Grins

Teake Hoekema

1) In folsleine list fan pref. Buma syn publikaesjes is gear to stallen út de opjeften dêroer yn *Flecht op 'e koai; stúdzjes oanbean oan prof.dr.W.J.Buma ta syn sechstichste jierdei* (Grins 1970) s. 380-384, *Us Wurk I-XXV ynhâldsopjefte* (Grins 1976) s. VII-IX en de jierboeken fan de Ryksuniversiteit to Grins oer de tiid nei 1969.